

# 抄本《蕙蓀堂烬存草》(下)

昭槎著 王大可标点

## 蕙蓀堂烬存草卷二

敬頤老人录存\*

### 送成悟庵司马之哈密

几年握手侍明光，知汝神锋太隽刚。爽朗自嫌无媚骨，淹通人羨富诗囊。明珠漫道多沉浦，古柏何妨久被霜。此去边城千万里，男儿正好计行藏。

夕阳客廨骑初停，把袂叮咛泪雨零。草出阳关先变白，人当绝塞好垂青。大宛秋早宜驱马，疏勒峰高待泐铭。此日羌夷齐慕化，试宣威德令同听。

### 挽黄香泾孝廉

雪夜曾同侍日华（君尝馆质邸），姿才秀异属君家。涪翁诗笔峰回势，叔度胸襟海量加。规谏书经传众口，歌场声早放淫哇。西风弹铗轻归去，燕树吴云入望赊。

十年故里久栖迟，垂老求名志可悲。伏骥未曾鸣北地，苍松已早损南枝。人生卒卒愁无限，天道茫茫问者谁。旅榭僧寮权寄厝，生刍几见哭君帷。

---

\* 录存者别署，此卷所题与卷一有异同。

### 送蒋香杜孝廉之蔚州

春风游子复归燕，襆被青毡意惘然。莫怨赋形徒九尺，何堪敛翼又三年。曳裾客散贫弥甚（时质邸初薨），负剑神孤技益专。糊口何当向边塞，旗亭草草饯离筵。

六月关门暑气消，万山青送马蹄骄。绛帷自愧温经少，白首心伤故国遥。夜雨离鸿悲远塞，寒烟废垒认前朝。知君诗笔多遒劲，吊古登临兴倍饶。

### 赠滕郎兰荅

春阴暗淡欲暝天，斗室谈心杯互传。一种真情微逗露，使人珍重使人怜。

琐窗金屋久棲身，底事蛾眉尚病贫，笑我疎狂无积蓄，貂褕典尽赠情人。

梦里相思镜里容，谁家姊妹出宏农。月光潋滟金盆浣，浑似瑶台意外逢。

歌拍相传老善才，名花珍惜日栽培。琵琶弹出骊珠似，真自霓裳谱内来。

### 送叶易之大令之鹤山任，兼寄韩桂舫中丞

青年潦倒客京华，捧檄遥乘万里槎。鲸浪远浮南海月，鳌峰新看上林花。山蒸瘴疠乡风恶，雨洗桄榔客梦赊。数载壶樽常醖饮，从今相忆各天涯。

故人节鉞驻羊城，清蔚家风夙擅名。廉让久更蛮俗犷，韬铃新荡海波平。邮亭飞报红旗捷，凤阙高颁翠羽荣。君去若经相问讯，为言荀令尚多情。

### 纪富察参政孝感破贼事

苍黎逃窜面如土，胡家寨贼如虓虎。元戎夜半弃师逃，稻塍

骸骨积成莽。谁其继者明将军，花骢万里来玉门。五千铁骑疾趋至，旌旗壁垒凝风云。残军闻命渐聚集，我公抚恤挥血泣。申明纪律励戎行，此战惟当仗群力。弦高犒军助帑饷，破贼今能膺上赏。黄金挥散买军心，连营未徙心先往。争驱用命矫若龙，贼众乌合难撓锋。四围伏起受讙给，塞门昼闭如泥封。我公下令纵瓢火，烈焰腾烧势压卵。巢倾路阻难窜亡，泗水踰垣计何左。三日火灭梟獍除，贼孥鱼贯行献俘。荆襄士女感浹髓。专祠绘像酬幃帟。公言此见一斑耳，蕞尔妖氛奚足齿。昔时血战苗峒间，至境壮心犹未已。诸将使尽如我公，安得烽烟九载兵初洗。（标点者按：原稿有缺误。）

### 南阳民

南阳民，生何苦？中丞苛虐猛如虎，威令稍遑立捶楚。双沟贼首驱民来，千呼万唤城不开。中丞匍匐若鼯鼠，偃旗息鼓藏草莱。朝献捷，暮献捷，捷书日上马汗血。官军四合三万人，何尝与贼一相接。今日携民妇，明日捉生人，贼徒屠斫饱颺去，护送出境争策勋！中丞凯还喜变嗔，督责供给胡不均？朝征羊豕，暮索金银，囊橐饱载，马行驂驂。中丞未至贼肆擄，中丞既至逃无所。昔曾畏贼今官府，南阳民，生何苦。

### 送成悟庵之易州任

铮铮百炼金，皎皎阴崖雪。融灭或有时，未若君刚洁。檣榦柳丝颺，长堤春草茁。出郭行送君，把樽相与别。惟君性简畅，胡为屡摧折。左迁近郊圻，师干未为劣。暇时展韬铃，军威严闾闾。俶傥叹汝才，恒餓笑我拙。应共守希夷，前途须结舌。

忆昔值承庐，胆胆互矜许。丈夫性磊落，不作谄谿语。共期劭忠贞，廊庙作夹辅。何期事多舛，明时遇谗阻。君今过易水，悲风叹千古。行当慳眠食，熟读歧黄谱。吾言久莫悖，居处自容与。

### 题强忠烈公像

死事原臣分，多蒙无济嗤。维公先发难，宗社赖扶持。黑夜锄凶日，孤城殉义时。千秋留庙像，正气塑须眉。

### 纪李大令事

黄河倒灌浸两淮，大吏赈恤纾民灾。有司把持俨奇货，鳞册萃集名浮开。维公查核窥弊窦，恫瘝在抱萦心怀。百万化鱼悲赤子，何可琴堂纵奸宄。走马挟册控高辕，直诉民情重差委。馈赂投赠挥手斥，贪夫垂颈难施伎。何来黠仆恶熏天，阴谋密订逆党联。中宵杯酒置酖毒，孤臣耿耿身弃捐。衽宏冤愤化碧血，清臣含殒犹握拳。幸有空箱血衣证，族人阖告爰书定。弥缝终未逃网罗，王章究竟除梟獍。官阶褒赠慰重泉，旌冤淑慝由君圣。或传异辞何渺茫，伯有示警尤荒唐。睢阳厉鬼誓非爽，循环天理真昭彰。丰碑墓道表奇节，过客千秋吊国殇。

### 送纳兰念农侍郎之西域

叹尔西征路，单车无尽时。晓霜迷马辙，暮雪覆毡帷。雁唳迎关早，春光度塞迟。感怀因去国，非独为名卑。

曲突功谁晓，迁延事可怜。愁看葱岭雪，目断海西天。乡思空成梦，瓜期代有年。何时归共饮，款款话穷边。

### 赠徐郎荣寿

风雨黄花欲暮天，宝儿曾复醉筵前。惺忪枕膝殷勤语，媚骨冰肌剧可怜。

旗亭秋晓饯行旌(送鲍双五学士之楚中)，射覆藏钩倍动情。樊圃残阳人已散，倚栏犹复奏秦声。

玲珑山馆怅斜晖，破壁藏孤事竟违(郎为马氏遗孤)。话

到邗沟风月景，背人往往泪沾衣。

闻道湘娥久病醒，沉沉院落卧桃笙。何当更赴瑶城约，剪烛街卮续旧盟。

### 雪中招凌郎琴心小饮

夜静垂帘兽炭围，窗前人报雪霏霏。玉奴酷好梳妆淡，恰称蒙茸点素衣。

小酌谈心绿蚁倾，湘娥真似玉山行。倩卿快雪亲摹抚，香吮银毫别有情。

### 有忆

咫尺春深宋玉墙，飞花历乱互相望。何能更化衔泥燕，飞向香巢共颡颥。

尸居木拱笑杨公，苦把骄禽闭槛笼。海上昆奴如可惜，早携神女下珠宫。

### 吴春麓擢侍御诗以贺之

台谏官威濯，簪毫侍禁垣。几人能黠直，名不忝陪鸛。羨汝真燕骥，惟余重鲁璠。佇看伏庭阙，侃侃进忠言。

笔砚同陈日，篝灯夜课时。与谈天下事，娓娓智多奇。浩叹才谁识，相规志不移。昌期今幸遇，端合早施为。

在昔西台习，纷呶罔息机。群江多报复，条析半纤微。望自隆驄马，名休负绣衣。由来雄耿士，原不计轻肥。

### 葺十笏山房诗以纪之

既病淡虚荣，学道慕清静。筑室远市尘，丘壑自创定。拳石假小窗，密竹引深径。鹤唳月临池，松声满云磴。聊以寄孤怀，敢云希名胜。焚香坐深漏，邈然意悠复。检书绎芸笈，礼佛击螺

罄。庶可息生机，藉以养慧性。

韦孟有凤箴，藩里诚恢囿。奈何事奢侈，古训自颠覆。垣宇非峻雕，椽栴就卑陋。蜗庐仅容躯，兼可养痾疾。犹胜尚淫佚，酣歌当白昼。名卉日灌艺，佳木渐葱茂。株守老氏训，幽恬杜外诱。

### 同旭亭师游陶然亭和韵

经筵订约访僧寮，款段迟行出近郊。山射朝曦紫郭外，春生新苇茁堂坳。短筇跻阁攀萝迳，皂帽凭栏拂柳梢。共话江亭清昼永，伊蒲饱食胜繁肴。

### 和旭亭师九日雪后登天元阁元韵

乐翁片舸返吴甸，揽胜探幽广闻见。燕台九月秋较早，雪拥鸣颺如激箭。冒寒破晓乘柴车，远订交游集道院。携筇高眺百尺楼，哪顾朝凉扑梨面。远山遥巘望模糊，积雪光摇目花眩。禁城宫阙五云中，绿树疏林尚葱茜。须臾晓日散林霏，迷离万缕烘霞片。秃裘解释寒顿消，松颠时复飘凌霰。回思琼宇筑前朝，石兽久经陵谷变。永陵此地祷苍元，枢臣黜赐香冠遍。政枋姑息付权奸，戎马郊圻肆酣战。百年人事等转瞬，巍阁仍然藻绩绚。宾朋挥酒任喧呶，拇战堪嗤白首颤。新诗争赋纪良游，故事无暇征书传。差胜东京作会人，辍笔题糕罢佳宴。

### 和旭亭师范文肃公墓元韵

缔造周邦日，天资佐命英。门楣夸赫耀，头角露峥嵘。黔首蒙扶济，寰区赖肃清。策敷齐邓禹，孺弃鄙终生。间谍诛骁将，机谋阻援兵。文阶同夹辅，祕院胜登瀛。海舶亲招抚，穹庐远定盟。缟衣尊义帝，传檄定神京。宽大彰仁政，操持总网絃。轻徭遵两汉，苛敛鉴亡明。旗制区分善，人材进退精。鸾书辞裂土，

麟阁早飞名。黄发曾颁儿，青山旧赐茔。象先增义产，继美祀严禋。绀宇临崖筑，巍峰向客迎。萝阶春雨滑，石磴暮云平。骏烈丰碑焕，鸿猷史册评。农夫锄墓道，野老拜长纓。我亦维楨裔，心伤里闾情。遗昆宜面嘱，勉力奋干城。

### 送吴春麓归里

风雪满林樾，天涯客竟还。行歌千里月，归梦六朝山。悽惻心如醉，萧疏鬓已斑。旗亭相话别，只觉泪长潸。

绿云春昼永，一载事经畬。竹坞同吟月，桐阴共较书。曹丘交尚侠，匡鼎志方摅。一旦轻分袂，长宵恨未除。

### 送谢芑泉典试陕西

函谷鸡声未曙啼，星轺千里向关西。五陵侠气今仍在，三辅风烟入望迷。树色远开秦塞迥，雁行遥送陇云低。岢峩太华当途出，济胜腰肢好独跻。

谢付〔傅〕中年信简狂，风轩尽日醉壶觞。祠坛新见冰衔换，四牡欣看翠旆扬。名器早传和氏钵，私囊羞置陆公庄。三秦兵燹初销歇，慎抚哀黎倍可伤。

### 赠蔡水部小坡

意外相逢手重携，蒹葭交倚镇相宜。蔡谟赅博□螯蟹，忠惠闲情谱荔支。红雨一庭春欲暮，绿柳半院日初移。疏帘清簟谈忘倦，玉麈高挥罢午炊。

### 题毕补垣过江草后

乌卿游倦返吴闾，鼓楫中流寄简狂。望海成连音自淡，渡湘贾付〔傅〕赋尤伤。金陵树色迷烟月，瓜步钟声送客航。夜半鱼龙应竦跃，知君奇句挟风霜。

### 寄洪瑞亭大令

风雨黔中路，君今滞几秋。遥闻归雁至，应使客心愁。炎微谁青眼，天涯易白头。休教恋五斗，及早返田畴。

### 秋夜宿崇效寺

野寺依城堞，停车漏已沉。孤槐半庭影，落月几家砧。素发惊初换，流光警客心。踟蹰难假寐，唧唧乱蛩吟。

### 春夜独坐

小窗浑兀坐，几度剪兰煤。听雁嫌春去，观书怕漏催。良时谁眷惜，壮志久灰颓。何以消清夜，呼僮拭酒杯。

### 赠王文光大令

近来王大令，搁笔懒临池。茅屋愁孤寂，晴郊事宴嬉。旗亭题壁惯，古寺访僧迟。往往寻山去，妻孥未预知。

### 春夜饮檀郎栾卿寓中席上偶成

远赴瑶姬约，琼浆饮玉京。晚风春渐好，积雪夜偏明。宛转调新曲，悠扬谱凤笙。最宜偎碧槛，款款话前盟。

### 过毕子筠孝廉斋

毕卓嗜狂饮，春风起每迟。苔封林外径，花扑梦中帷。久候宾生厌，相迎仆尚嬉。衔杯谈未竟，月已上西窻。

### 慈寿寺

禅宫经浩劫，古塔尚嶙峋。梵呗扬山郭，松杉远市尘。风寒鸦噪夕，地僻草含春。老衲身犹健，三车话往因。

### 宿龙泉寺

禅房时借宿，待客户常开。人定市嚣寂，月明山鸟来。粉垣遮薜荔，古径积苍苔。饱食伊蒲馔，优闲信旷哉。

### 右安门外即目

隐约禅扉逼野塘，柳阴系马纳朝凉。乱蝉十里客心碎，清磬一声秋思长。帘影远飘沽酒肆，讴歌遥送钓鱼航。东华尘土时沾浣，此趣由来未易尝。

### 感怀

涉世由来贵立身，何妨带索困泥尘。楚金待冶方知价，卞璞经磨始共珍。白眼厌逢褻袖客，侠肠难遇鼓刀人。敢云季主甘颓放，卖卜城南效隐沦。

鬼难风灾惯坎坷，偷闲鼓缶自高歌。剑埋黑狱光仍烛，骥负盐车志不磨。孟敏隳罍心莫恋，嵇康造锻性原颇。赋成鹏鸟谁相惜，婞直何须吊汨罗。

### 淋沟道中

明发驱征辔，长堤月半残。马嘶荒店晓，犬吠古村寒。地僻稀逢客，途长未假餐。檐帷风鼓盪，顿觉敝裘单。

### 良乡客寓

团焦如太古，四面覆茅茨。店僻宾停少，村荒酒上迟。豆花开隔壁，果瓠压衰篱。傭保劳传语，前途路又歧。

### 宏恩寺

禅堂灯火暗，縹马被初摊。风槛繁星皎，空庭白露寒。泉甘

宜斗茗，香裊静添檀。作客无多日，萧然意已闲。

### 彰村古寺

话别何淹滞，栖鸦已满林。归鞍征路杳，古殿夕阳沉。隔牖山容杳，当窗落叶深。鸣颺下檐铎，槭槭感人心。

### 新城道中

古堞烟波外，空濛岸柳遮。栖鸦下遥渚，孤雁落平沙。冒雾过荒驿，浇寒觅酒家。仆夫私共语，归路计犹赊。

### 月夜游尺五庄

稻塍连远陌，风趣似吴江。月色下溪阁，花阴移琐窗。空亭吹短笛，孤浦泛轻舫。待尽良游兴，尤宜掩玉缸。

### 挽钱辛楣宫詹

耆儒推贾郑，吴苑久持衡。生寄一编守，死传千古名。无缘依绛帐，有唁赴佳城。化鹤人何在，须知返玉京。

### 崇化寺

杖策寻纡径，崎岖一线通。樵歌暮云外，孤磬乱峰中。山色朝昏改，河声日夕东。林峦归路晚，端合宿禅宫。

### 鲍家寺

借宿归何晚，萧然旅梦凉。松花落僧院，山月上邻墙。老衲除茶灶，奚奴解客装。挑灯欹角枕，耿耿漏偏长。

### 送熔斋舅氏再之西域

谪宦何堪再，天涯心事违。霜风劲晨鼓，落月冷征衣。葱岭

重题句，龙沙惯合围。君恩垂世阙，白首定生归。

### 题蒋香杜孝廉郊行图小照

水木何明瑟，徜徉认旧蹊。人归芳草渡，鸟散落花堤。斜日  
偎藤杖，荒园理竹鞵。悠闲足娱老，馐餍有菜妻。

### 题蒋竹村高士图

枳篱依静渚，茅屋晚来幽。暮色烟波淡，泉声枕簟秋。翻书  
排缥帙，说剑按吴钩。企羨逃尧者，还宜理钓舟。

### 秋夜独坐

药铛童已淪，蕙炷手亲焚。月色来何暮，蛩声夜独闻。庭除  
沉玉漏，天际淡归云。耐可亲灯火，覃思肆典坟。

### 功德寺

招提传往代，玉殿倚河湄。霁色依山远，霜钟隔浦迟。蓼花  
明远岸，木叶落空陂。策马重经过，何堪鬓若丝。

### 送王楚珍学博返上元

学舍方舟冷似冰，绦鞵久已困饥鹰。思鲈正及西风起，弹铗  
何堪夜雨增。书剑三秋辞凤阙，云山千里返金陵。到家调膳时多  
暇，六代荒基试眺登。

### 游履邸绚春园

梁园近筑帝城隈，骀宕东风柳线才。画阁昼开人未至，湘帘  
晴卷燕初来。萋萋绿草堪为席，灏灏飞泉可泛杯。愧我老来诗笔  
秃，敢云司马擅雄才。

### 送奉义侯之热河

宝马黑貂裘，翩翩赋壮游。淡烟山路晓，夜雨塞垣幽。旅雁鸣沙浦，栖鸦露野洲。男儿贵名节，端不作离忧。

### 客至

花落梦未醒，客来惭起迟。衣冠懒妆束，茶果颇相宜。乌几偃联句，蕉窗好较棋。高谈清昼永，鸡已上荒埗。

### 送方云裳明经还乡

久病文园判隔年，天涯弹铗意萧然。已闻疏傅辞金阙（谓刘云房相国），又见终生返汉川。钓艇漫披新绿箬，蜗居仍守旧青毡。倚闾喜睹双亲健，买犊高耕负郭田。

### 新居即事

高轩新筑逼河湄，啸咏朝昏事事宜。窗覆轻纱因待月，壁油白版为题诗。酒兵夜拥消愁病，茗战晨酣解梦痴。最好闭关鲜客过，世途荣辱未曾知。

### 送韩所瞻还乡

马卿游已倦，庄舄动孤吟。燕市一樽酒，吴门千里心。西风催木落，凉月照江深。恣意酣书史，休愁年鬓侵。

### 雨中游庆丰闸

风急天低蹴浪纹，轻舟争泊势纷纭。萧萧断苇远汀雨，漠漠归鸦南浦云。近郭模糊烘淡墨，远峰明灭露微曛。来朝恰好逢重九，乘兴还宜醉夕醺。

### 春夜雨中言怀

黄昏人意懒，兀坐酒初斟。春雨竹窗静，孤灯夜雨沉。门稀通简札，客少盍华簪。遥忆沧洲兴，流光触素心。

### 赠张山人仙槎

兀傲从来属醉颠，全生樗栎尽天年。每因排闷聊孤酌，只为招游偶擘笺。放迹不离萧寺里，乘凉长在野塘边。他时书帙寻佳话，骠骑翻由第五传。

### 易水道上

平明辞逆旅，途远露沾襟。马度官桥阔，莺啼杨柳深。晓钟清客梦，归雁警人心。企慕长江尉，遗墟尚可寻（路傍有贾浪仙祠）。

### 出塞曲

短剑向边城，天山月正明。塞云连断岭，野火照荒营。虎帐朝吹角，鸾钗夜弄笙。龙庭犁有日，端合请长缨。

### 送续顺公出守西域

风雪遄征绝域西，阳关独眺暮云低。人离故里频回首，马度荒原每骤嘶。白草行围烹鹿脯，黄沙凿井饮留犁。羊皮片纸何柔膩，恰称家书带醉题。

### 送朱野云上舍

若到桐庐去，孤怀可暂宽。闲云栖别墅，冷月钓荒滩。野水蒹葭白，苍烟鸥鹭寒。衔杯自终夕，无梦到长安。

### 过玉泉禅院

古木耸烟鬟，巾车数往还。村稀临野渡，路曲近秋山。农老锄横荷，僧颓梦亦闲。沙鸥冲客过，见惯不相关。

### 送叶易之大令南归

长安羞乞米，远扣故园扉。松影摇山翠，花香送客归。暂抛新简牍，仍着旧儒衣。朝选须重谒，休教赋采薇。

### 送杜稜郡王归藩部

朝天因辑瑞，经岁返鸣銮。雁背桑乾月，秋生大漠寒。导行皆毳服，扈送有王官。传颂枫廷圣，遥知部族欢。

### 涿州道上

晓色鳞鳞动铎铃，衰尘恰好雨冥冥。途逢乡客应相讯，车过村墟每少停。草径远连南浦绿，柳阴微露远山青。轩皇战伐留祠庙，落日栖鸦遍庑庭。

### 赠曹约斋太仆

曹唐果仙去，篱舍筑依山。漫说贫堪叹，须知乐是闲。更无青盖往，只有白云还。啸咏松颠月，柴扉未上关。

### 过秋斋主人邸第有感

缙岑仙笙杳，朱门锁碧空。萧斋摧竹雨，孤槛落花风。送酒思蝉鬓，烹茶剩鹤童。日华谁吊眇，俯仰恨无穷。

### 暮春即事

一夕雁声至，满庭春色归。卷帘红渐落，绕屋绿增肥。柳岸

晴波涨，林塘夜雨微。感怀弹玉轸，古调寄清徽。

### 赠程蓉江先生

道腴身自健，茅舍独优游。白发随秋老，黄花供客愁。林霏时步履，野港每登舟。手注岐黄法，奇方足可搜。

### 寄宗兄黻庭上公

提军屯北海，入夕每思家。冷月三更笛，寒云万里笳。更无春入塞，只有雪飞花。雁信何时达，迢迢隔岁华。

### 寄韩听秋孝廉

伯子归吴甸，遐踪不可寻。心随鸿雁尽，目断白云深。箏或眠花圃，舟宜钓柳阴。文昌悲病矐，端好鼓鸣琴。

### 追想

追想谐欢歌舞场，宝鬟兰雾影微茫。花明别馆笙箫合，风度重楼罗绮香。酒为杀寒斟浅爵，扇因障笑启空箱。而今迁逝何堪说，冷巷残鸦剧断肠。

### 自叹

剖璞焚兰信小愆，圆扉久系愧难胜。忍将何面归丘垄，尚有惊颜畏友朋。苏轼诗成羞远寄，江淹书就竟谁登。从今偃息栖林莽，诵偈修斋俨戒僧。

### 寄毕澍堂赞府

几载青袍滞汉阴，哦松射鸭最伤心。乡关梦醒雁初至，黄叶吟成秋已深。郭默城荒堪试马，庾公楼敞好题襟。何时更鼓毗陵棹，淼淼沧洲不可寻。

### 即席吴山尊学士

岸帻掀髯七尺身，鲸吞沧海性情真。惭时倾益愧知己，久饮诗名如故人。吴祐正宜交杵臼，草庐端合掌丝纶。恰当蜡祭迎郊鼓，狂宕何妨尽此晨。

### 遊果邨园

一径入泉石，颓垣低薜萝。松阴踏碎月，竹牖闻清歌。主人恒好客，遊宴依山坡。开襟涤尘虑，佳话幽兴多。绮筵奉德音，冥心志不磨。

### 戒台坐月

紺宇依山顶，秋云傍栈生。孤峰迎落月，古壑落松声。檐铃风中乱，霜钟夜半清。老僧持戒律，端可语深更。

### 哭顾蓼生孝廉

迁逝年来甚，于君感最深。怀哉茂苑客，思作广陵琴。掩袂悲新月，開箱理旧吟。朋簪萦往昔，风雨更关心。

### 贈赵远峰司马

逖翁居野壑，深夜闭松关。把酒聊排闷，看山暂解颜。烹茶无健仆，侍寝有双鬟。策蹇来城市，风尘独往还。

### 残杏

墙头垂烂熳，势已十分开。落蕊迎风堕，残香送雨来。上林人久去，深巷担空回。太息韶光尽，无烦羯鼓催。

### 夏日闲居

年来居处颇相宜，石榻招凉坐未移。酌酒松阴愁月度，观书

花下倩风吹。竹催残暑随云散，荷送清香度槛迟。永夕闭关无客至，巾衫奚必着轻絺。

### 偶题

孤洁叹累臣，颠危剩此身。荣枯天所赋，谗赞尔何人。故宅花无主，圜扉草不春。朝来慵洗面，惟有泪沾襟。

### 寄韩所瞻上舍

旅邸韶光浅，孤踪剧可怜。寻春时早出，听雨每迟眠。排闷倾琼液，陶情拨雁弦。城南阻泥潦，芳讯赖诗笺。

### 忆毕补垣

归装悲澈薄，书剑自相携。夜雨天涯路，孤灯午夜鸡。延之笺懒答，司马柱羞题。通问知何处，离思满浙西。

### 赠思元主人

试问朱门胄，奢豪近若何？春寒花坞酒，秋月竹楼歌。选妓章台遍，论交陋巷多。褰裳任销匱，端不废吟哦。

### 闲居

放旷年来惯，荣名委逝川。小楼倚云立，斗室伴书眠。煨药炉常爨，寻花屐半穿。反嫌吟社友，剥啄递诗笺。

### 山居即事

旬日居山寺，幽恬意适然。烟岚秋雨际，斜雁暮云天。采菊临东涧，沽醪向野廛。底须皈净土，蒲座学枯禅。

### 无题

红楼空闭碧波浔，修态姱容不可寻。风月去留原有定，水云

聚散本无心。犹疑玉管吹花外，曾记金鞍系柳阴。底事梁清遭谴谪，鸩媒何处寄佳音。

### 春夜即景

竹坞散轻烟，冥冥欲暮天。雨将花共落，云与月俱妍。酳酒偏宜醉，焚香尚未眠。美人去何所，谁复鼓鸣弦。

### 咏古

自古无双士，多从事后推。披沙金始见，剖璞玉方知。脱颖惊毛锐，乘风讶鬣奇。余皆老檐隙，淹没不胜悲。

### 雨后郊行

春郊逢雨霁，骋望兴悠哉。雾敛晴岚出，云销远郭来。绿催娇柳嫩，红缓湿花开。最好归林鸟，沿途送客回。

### 秋日赠毕补垣

数年弹铗困京师，裘弊囊空事可悲。黄叶黄花为客日，秋风秋雨上灯时。空怜吏部眠醺甕，几见干城出禁帷。耐可陈蕃犹敬宠，白头时与慰离思。（时寓唐松岩水部宅）

### 忆吴兰雪博士

独坐空亭日易昏，故人书剑返江村。紫云断处人千里，竹叶浓时酒一樽。蛛网阴廊诗在壁，春归芳草屐留痕。何时短艇逢中渡，风雨相思好细论。

### 赠顾星桥铨部

愷之庚甲已知非，京邸淹留尚未归。诗思苦随秋叶减，宦情淡共白云飞。燕南浊酒愁难释，木渎扁舟愿重违。漫道冠裳多辐

集，放衙依旧掩荆扉。

### 春日忆韩听秋

小院幽窗百感生，故人曾此送行旌。落花恨逐邗沟水，芳草春迴茂苑城。古道深更稀去雁，长堤细雨有啼鶯。须知何逊开莲幕，解赠绨袍见旧情。（谓曾宾谷转运）

### 追悼黄香泾孝廉

鹤发朱颜不可追，僧寮旅榭最堪悲。广陵散奏欢如昨，孤馆花开共赏谁。将就园应遊宿世，汝南碑自悼明时。更怜刘峻伤同调，地下传书泪共垂。（谓芙初太史）

### 感兴

已悲梧叶坠空林，喜见黄花散碎金。荣辱何关他日事，忧欢并集此时心。棘猴伎莫传韩国，芻狗机应息汉阴。最好携樽就晴墅，陶然偃卧自长吟。

### 寄尤水村

鹤驭还乡有岁年，萧闲真作地行仙。音书寂寞邗江外，杖屨逍遥古壑边。老健酒为招友帖，家贫画易买山钱。明驼绝漠当时事，讽诵残篇泪泫然。（先生曾从恭王出塞）

### 闲兴

最好年来自在身，闲云野鹤久相亲。不胜金谷输筹酒，惯作濠梁得意人。闭户吟哦如过夏，入山登眺更宜春。迴思首列鵷行日，霏雪严更赴紫宸。

### 送刘澄斋大令还乡

棹歌高唱暮船开，千里烟波客竟回。张翰今朝遂初志，渊明

当日赋归来。鲲鹏已见三年伏，骐驎原非百里才。祖帐冠裳连两岸，秋风离思满金台。

### 郊垌即事

出郊小憩却游辇，杖屨春风惯踏青。为觅名花来古寺，因求沽饮过旗亭。山围远郭云初霁，杏出危垣户半扃。日暮徐行莫归去，柳阴莺语最堪听。

### 寄熔斋舅氏

阳关西去路无穷，塞草飕飕送晚风。孤馆蛩吟秋夜半，荒原雁下夕阳中。玉埋雪渚稀人迹，马度胡沙有信通。堪叹临边珽定远，白头何日返青骢。

### 雨中言怀

寂寂春将半，冥冥积雨天。畏寒朝懒起，贪酌夜迟眠。冯衍歌空就，渊明宅竟迁。穷愁谁与诉，抚景惜流年。

### 春日游盘山

隔涧疏钟送远声，芒鞋好踏晓山晴。烟迷柳暗遊难尽，径曲峰迴望不明。蛮榼满盛香蕨美，春衫早试素纱轻。杏花引客归荒寺，醉卧禅床待月明。

### 感遇

花落鹃啼旧馆寒，清光空覩月团栾。广陵散奏春何限，锦瑟音稀漏已残。海上有书凭付鹤，帐中无梦可骖鸾。十年盟约何堪说，□倚银屏泪莫干。

### 送杨晋藩孝廉南归

十载春明鬓未华，旗亭樽酒雁疏斜。三更夜雨愁孤客，千里

虚舟宿苇花。王粲有才悲未遇，刘蕡无命莫伤嗟。鹏程计首扶摇上，清德还须继尔家。

### 忆旧

玉瘞花残剧可怜，锦帷绣榻故依然。半生笙管销金粉，五载痴情委逝川。梦返西园应化蝶，魂招碧海尚疑仙。何堪偃枕缠绵日，犹记鞶囊约未缘。

### 读史

世风由日降，取媚尚脂韦。正使从奔竞，何尝计是非。谁甘绳木正，终蹈累棋危。唯有鸱夷子，扁舟竟不归。

### 夏日闲居

久慕清闲愿近偿，经旬不复命冠裳。竹窗静坐鸡声杳，松榻高眠鹤梦长。酒漉郫筒籩乍熟，饭蒸瓦甑稻生香。临门幸少催租客，竟日狂吟兴未央。

### 冬日即事

华簪积习久消除，白帽青藜乐有余。淡泊尚能甘布菽，轻狂非是薄诗书。人归月夜惊邻犬，雪覆溪桥策蹇驴。竟夕酣歌心自适，柴扉无复驻轩车。

### 送冶亭制府谪戍西域

荷戈行万里，短鬓换新霜。纵使吞舟漏，终强政体伤。亭臬金戍思，风雪玉关凉。载笔吟何健，平沙兴甚长。

### 忆毕澍堂赞府

潜虬手令擅当场，每遇宾筵意莫忘。一自哦松轻适楚，遂令

双鲤阻浮湘。行看归雁蓟门远，坐听寒蛩秋夜长。漫道干将莫邪冶，自呼负负实堪伤。

### 昆明湖晚眺

十里平堤接柳塘，侍臣珂马散长杨。荷香远浦雨初霁，蝉噪夕阳风尚凉。天衬云山笼暮色，虹连台榭浸湖光。输他渔艇垂纶叟，终日徜徉在水乡。

### 闲兴

少习弓刀老未忘，抚髀清夜自心伤。灯前看剑暮云黑，庭际醉歌秋树黄。塞上风高思射雁，城南草浅好求獐。有时折节亲书史，章句埋头笑董匡。

### 喜黄香泾孝廉至

草绿晴洲花半开，明窗徙倚意徘徊。夕阳独眺楚天霁，春雨客从吴地来。停辂林扉欣握腕，解衣清画共衔杯。挑灯话到分襟日，冷落梁园实可哀。（谓秋斋主人）

### 送吴龙友下第归乡

跃冶干将事已虚，风胡未遇恨何如。甘归江上勤驱犊，耻向梁园久曳裾。带晓残星明别浦，冲寒古道策疲驴。行装漫愧貂裘敝，尚有菜妻共隐居。

### 北郊感兴

杖屨经行鵝土城，凭高俯眺不胜情。蓟门烟树正秋色，西岭云峰向晚晴。台畔几曾来乐毅，市中无复遇荆卿。金风征雁过沙渚，故国遗墟感废兴。

### 秋夜

秋声枕上警芳心，华发何堪岁月侵。风劲远鸣千里雁，雨寒遥听万家砧。百年事业惭青史，阅世恩仇抚剑镡。郭解不逢宾石死，人间侠士漫追寻。

### 秋日龙泉庵晚坐

寂寂禅堂日夕曛，眼前红叶坠纷纷。数声寒雁过前岭，一抹秋山掩暮云。瓦绿芸窗新茗试，炉红蒲座炷香焚。静中众妙须参悟，缥缈霜钟隔涧闻。

### 拟唐人早朝

华盖朱轩耀禁城，龙墀鹄立听咸英。钟传长乐金门晓，鸦噪蓬莱苑柳晴。双阙呼嵩群待召，九天鸣蹕静无声。近臣退捧丝纶出，海寓颁宣颂圣明。

### 秋晚即目

坐拥琴书白日闲，推迁节序镇相关。菊开忽忆囊中酒，木落远来林外山。未遣云鬓终愧白，欲投綵管耻同班。巾车正好临郊墅，笑插茱萸慰醉颜。

### 书室自题

窗几净无尘，埋头肄典坟。书残容许借，笔秃便宜焚。长夜须煨砚，阴霉早贮芸。倘逢冠盖辈，切莫与谈文。

### 春郊

试问城南路，韶光近若何。烟笼金勒缓，香拥钿车过。柳色河桥早，春声花巷多。嬉游应有兴，席地自高歌。

### 访张云栖山人

荆扉耐远寻，遥驻白云岑。爱菊嫌秋去，贪杯畏日沉。依山宜作画，煮雪好谈心。时有清猿至，遥鸣古壑阴。

### 题秋江晚霁图

江色澄新霁，微茫日已西。高樯偃港隘，孤雁赴汀低。浦溆苍烟淡，蒹葭暮笛凄。栖迟愁估客，乡路望中迷。

### 岫云寺夜坐

崇朝岩壑供冥搜，归卧禅床景物幽。隔岭闻钟知有寺，捲帘看月最宜秋。遥聆山鸟惊林散，恍见飞萤入座流。恰喜老僧持半偈，观心不藉远追求。

### 清明即景

清明犹未着单衣，草色模糊掩竹扉。桥畔柳颺牵荇去，云中雁唳送春归。闲窗滹酒炉仍爇，晴墅寻朋扇可挥。几日东风天向暖，飞花历乱满林霏。

### 密云道上

客馆逢秋雨，停驂喜乍晴。黄花生酒思，衰草动离情。篱菽堪供馔，邻鸡许贱烹。俚炉问前路，积潦可能行。

### 春晓

年来稀进谒，慵懒颇相宜。雨过看花瘦，天寒起被迟。更无人叩户，只有酒盈卮。日永支颐坐，容颜镜里知。

### 万泉庄晚眺

四望唯烟水，空濛涨晚隄。野莺啼远树，孤鹭下新畦。白发

栽香稻，青蓑辄短犁。西山遥送雨，一抹暮云低。

### 送人之旌德

风雨一天秋，旌阳是胜游。林鸦鸣避缆，枫叶落随舟。解赠延陵剑，谁怜季子裘。蓬窗坐深漏，端好绘沧洲。

### 秋夜

不眠思往事，耿耿漏何深。冷院虫声细，孤灯夜雨沉。家贫朋自少，身老病偏侵。惆怅拈鬚坐，奚烦更苦吟。

### 首夏即事

首夏时晴霁，优游好读书。树高栖鸟暇，簾静午风疎。砚垢呼僮拭，窗棂倩婢除。麀居端可乐，何必慕樵渔。

### 扈从良乡恭纪

羽仗巡畿甸，离宫驻玉銮。风云千帐拥，灯火万星攒。晴墅烟初霁，春郊夜尚寒。侍臣扈輿卫，日久敢求安。

### 恭谒泰陵

陵树郁岿峩，珠丘望尚遥。月穿松下路，霜压渡头桥。碧殿阴初合，深崖雪未消。百年遗老在，聪哲话先朝。

### 冬□

岁晚风凄紧，天寒日易斜。窗虚罨飞叶，户敞冻残茶。拥被炉偎枕，传杯雪当花。少时逢此际，较猎向山家。

### 冬日过香界寺

梵舍栖岩壑，纤途不易寻。松高风愈健，云定雪行深。净室

飘茶篆，危檐送铎音。山僧持律久，端合证禅心。

### 冬夜即景

城头画角沉，岁月去駸駸。看雪嫌风劲，弹琴爱夜深。愁穿东郭屐，谁赠陆生金。破晓邻钟动，凄清警我心。

### 秋晚

古屋夕阳残，敲窗木叶干。秋深惊树瘦，裘敝觉天寒。折节同周处，兴谗悼子兰。知音近存几，杯酒与谁欢？

### 读屈贾合传

楚怀无道汉文贤，野鹏江鱼总可怜。薜荔深山空偃蹇，鬼神宣室强周旋。子兰易怒迁宗老，绛灌无才薄少年。千古龙门真巨眼，渡湘一赋即骚笺。

(全集完)

---

## 湖北红安的陈氏族谱

红安县志办，在征集资料时，征集到一部陈氏族谱，封面有黎元洪的题字。按黎元洪，字宋卿，原籍黄陂人，故有黄陂之称，陈氏族居黄陂。黄安的人很多，且陈氏之祖陈宗英，明洪武二十七年中进士授黄陂令。清末，有陈铁侯者，字孝芬，是黄安县离黄陂边界仅二里地的马家龙村人，武昌起义时，住军务筹备员，后举为水师统领，指挥江河水师。又有陈鸿翼者，字逵九，是离大悟县河口镇不远的黄安县四方湾人，清末任五品京官。武昌起义胜利后，（1914年）陈氏设谱局于武昌，陈逵九为陈氏谱局监修。由他们两人出面，请求黎氏题字，这样黎元洪就亲笔书写“陈氏族谱”四字，并签名盖章，流传至今。

• 陈友良、程敬文 •